

Innaallagissamut, imermut ataatsimoortumillu kiassarnermut il.il. akigititat aalajangersaasarneq pillugu Namminersorlutik Oqartussat nalunaarutaat nr. 22, 22. december 2017-imeersoq

Nukissamik pilersuineq pillugu Inatsisartut peqqussutaat nr. 14, 6. november 1997-imeersumi § 18, imm. 3, aamma § 21 naapertorlugit makku aalajangersarneqarput:

Kapitali 1

Atuuffia

§ 1. Nalunaarummut ilaapput pilersuviit innaallagissamik, imermik ataatsimoortumillu kiassarnermik pisortat pilersuviinut pissarsiniartarnermik, ingerlatseqqittarnermik, tunisassiornermik siammarterisarnemillu suliaqartut.

§ 2. Nalunaarut inunnut namminneq atuisartunut nalinginnaasutullu inuussutissarsiorfimmi niuerfigisanut assigiissitanik akigititanik, kiisalu agguataakkanik naatsorsuusiornermut atugassamik pilersuviit aningaasartuutit agguataarnissaannut aalajangersaavoq.

Kapitali 2

Akigititamut allattuiffimmi immikkoortukkuuttaanut akigititap aalajangersarnera

§ 3. Akigititamut allattuiffimmi niuerfigisaqatigiit 1-ip malitsigisaanik illoqarfinni nunaqarfinnilu inuit namminneq atuisartut aamma nalinginnaasutut inuussutissarsiorfimmi niuerfigisat innaallagissamut imermullu assigiissitanik akigititanik akiliissapput, takuuk ilanngussaq 1.

Imm. 2. Aalisakkanik suliffissuaqarfimmut akigitanut ilaasutut niuerfigisanut inuit namminneq atuisartut aamma nalinginnaasutut inuussutissarsiorfimmi niuerfigisat ilaanngillat, takuuk § 4.

§ 4. Akigititamut allattuiffimmi niuerfigisaqatigiit 2-p malitsigisaanik illoqarfinni nunaqarfinnilu ataasiakkaani tamani innaallagissamut imermullu aalisakkanik suliffissuaqarfimmut akigititap aalajangersarneqarpoq, takuuk ilanngussaq 1.

§ 5. Kingusinnerpaamik ukiup atuuttup naanerani akigititanut allattuiffimmi akigititat ukiut tamaasa aalajangerneqartassapput, takuuk ilanngussaq 1.

Imm. 2. Akigititanut allattuiffimmut allaqqaagaq kingusinnerpaamik ukiumi atuuttumi decembarimi Naalakkersuisunit akuersissutigineqassaaq.

Kapitali 3

Agguaassinermut naatsorsuutit

Sumiiffikkaarlugu ukiumoortumik suliarinnittarneq

§ 6. Pilersuviit ataasiakkaat ukiut tamaasa agguaassinermut naatsorsuusiortassapput ukiumoortumik naatsorsuutini paasissutissaatit assingi toqqammavigalugit, sumiiffinnut tamanut ataasiakkaanut atuuttunik, takuulli imm. 3. Sumiiffittut paasineqartassapput illoqarfiit ataasiakkaat aamma nunaqarfiit ataasiakkaat.

Imm. 2. Illoqarfiit marluk arlallilluunniit tunisassiornermik siammaterinermillu pilersuivimmiit ataatsimit pilersorneqartarpata, tamakku sumiiffittut ataatsitut naatsorsuutigineqassapput.

Imm. 3. Pilersuivinnik ataasiakkaani agguaassinermut naatsorsuutitut, imm. 1-imi aalajangersarneqartunut attuumassuteqartunik ilassutitut nalunaarsuinernik aamma misissueqqissaarinernik suliaqarnissaannik Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik peqqusisinnaavoq.

§ 7. Agguaassinermut naatsorsuutit illoqarfinni nunaqarfinnilu Nukissiorfiit najuuffigisaanni pilersuiffigisaanilu naatsorsorneqartassapput.

Kapitali 4

Periusissatut tunngaviit

Ingerlatsinermi sanaartornermilu aningaasartuutit

§ 8. Agguaassinermut naatsorsuutitut ilaapput pilersuiviit ataasiakkaat ingerlatsinermi sanaartornermilu aningaasartuutaat imatut paasineqartussat:

- 1) Toqqaannartumik toqqaannartuunngitsumillu aningaasartuutit, taakkununga ilanngullugit sulisunut, naammassisaqarsinnaassutsikkut aningaasartuutitut, isumakkeerisarnernut, nioqqutissanik atuinermut, ernianut il.il. aningaasartuutit.
- 2) Pilersuiviup nammineerluni akilersuutigisartagai.

Aningaasartuutit

§ 9. Aningaasartuutit imatut agguataarneqartassapput:

- 1) Annertussutit pilersuutigineqartut aallaavigalugit agguaassisoqartassaaq, annertussutsilli akiligassiissutigineqarsimasut atorneqartassapput, annertussutsinut pilersuutigineqartunut tatiginartunik paasissutissaqanngippat.
- 2) Innaallagissamut, imermut kiassarnermullu toqqaannartumik aningaasartuutit isertitallu assigiinngitsut toqqaannartumik innersuunneqarsinnaasut illoqarfinnut nunaqarfinnullu ataasiakkaanut naatsorsuutitut ilaatinneqartassapput.
- 3) Immikkoortortaqaqarfinnut, illoqarfinni nunaqarfinni assigisaannilu nukissiorfeqarfinnut ataatsimoorussamik aningaasartuutit agguataarneqartassapput innaallagissamik, imermik kiassarnermillu pilersuinermit immikkoortortaqaqarfinni, innaallagissamut imermut kiassarnermullu sulisunut, naammassisaqarsinnaassutsimut isumakkeerisarnernullu aningaasartuutit malillugit. Qitiusumik allaffeqarfimmut aningaasartuutit, nukissiorfeqarfiit sulisunut, naammassisaqarsinnaassutsimut immikkoortortaqaqarfinnilu ataasiakkaani isumakkeerisarnernut tamakkiisumik aningaasartuutit malillugit, innaallagissamik, imermik kiassarnermillu pilersuinermit agguataarneqartassapput. Tamatuma kingorna aningaasartuutit immikkoortortaqaqarfinni ataasiakkaani pilersuutigineqartut naapertorlugit illoqarfinnut nunaqarfinnullu agguataarneqartassapput. Qitiusumik allaffeqarfimmit tamakkiisumik agguataarisinnaaneq periarfissaqassanngippat, qitiusumik allaffeqarfimmi aningaasartuutit ilanngaassineq pisinnaasaaq tunngavilersorluakkamik missingersuineq tunngavigalugu.
- 4) Agguaassinermut naatsorsuutitini Namminersorlutik Oqartussanut akiliutit, taakku ataanni kiffartuussinermit isumaqatigiissutitut akiliutit, ilanngunneqassanngillat. Taamaattorli Inuussutissarsiornermut, Suliffeqarnermut, Niuernermut Nukissiuuteqarnermullu Naalakkersuisoqarfik tamatumunnga akuersissuteqassappat akiliutit ilanngunneqarsinnaapput.

Suliffeqarfimmi namminermi akilersuisarneq

§ 10. Suliffeqarfimmi namminermi innaallagissamut, imermut kiassarnermullu akilersuisarneq imatut ingerlanneqassaaq:

1) Tunisassiorfinnit siammarterivinnit allanit innaallagialaq, imeq kiassarnerlu pissarsiarineqartarpata tamanna akilersorneqartassaaq atuisumut aningaasartuutit sipaarutaasut aallaavigalugit. Taamatut akilersuisarneq nuna tamakkerlugu agguaqatigiissitsisimanermit tunngaveqartinneqassaaq.

2) Erngup nukissiorfimmit innaallagialaq kiassarnerlu sinneruttoq pissarsiarineqartassaaq suliffeqarfimmi 0,01 kWh-tut akilersuinermit aki naapertorlugu.

Imm. 2. Kangerlussuarmut Narsarsuarmullu atuuppoq, nunap sinneranisut suliffeqarfimmi akilersuisarnermit aki atorpeqartoq atorpeqartassamat.

Ilanngaaseereerluni erniat

§ 11. Ilanngaaseereerluni erniat agguataarneqartassapput ukiup naanerani illoqarfinnut nunaqarfinnullu innaallagissamik, imermik kiassarnermillu pilersuinermit sanaartukkat nalingi naatsorsuutini allanneqarsimasup nalinga naapertorlugu.

Isumakkeerisarnerit

§ 12. Isumakkeerisarnerit, taakkununga ilanngullugit nalikilliliinerit naleqarnerulersitsinerit, pilersuiviit ukiumoortumik naatsorsuutaannut maleruagassat naapertorlugit ilanngunneqartassapput.

Imm. 2. Agguassinermit naatsorsuutitigut takuneqarsinnaassaaq, pigisat sorliit isumakkeerneqarsimanningersut.

Kapitali 5

Immikkoortukkuutaanut aningaasartuutit naatsorsorneqartarnerat

§ 13. Immikkoortukkuutaanut aningaasartuutit naatsorsorneqartassapput agguataarneqartussanik naatsorsuutini aningaasartuutit naatsorsorneqarsimasut annertussutsinik pilersuutigineqarsimasunik agguarlugit, annertussutsit akiligassiissutigineqarsimasut ikiorsiullugit.

Imm. 2. Inuussutissarsiornermut, Suliffeqarnermut, Niuernermit Nukissiuuteqarnermullu Naalackersuisoqarfiup nalunaarutigisinnaavaa, suli aningaasartuutitigut kisitsisinik allanik naatsorsuisoqassasoq.

Kapitali 6

Allaffisorneq

§ 14. Agguassinermit naatsorsuutit Inuussutissarsiornermut, Suliffeqarnermut, Niuernermit Nukissiuuteqarnermullu Naalackersuisoqarfimmut nassiunneqassapput.

Kapitali 7

Atuutilerpera il.il.

§ 15. Nalunaarut manna 1. januar 2018-imi atuutilerpoq.

Imm. 2. Tamanna ilutigalugu Innaallagissamut, imermut ataatsimoortumillu kiassarnermut immikkoortukkaanut aningaasartuutit naatsorsorneqartarnerini aningaasartuutit agguataarneqartarnissaannut periusissatut tunngavissanik aalajangersaasarneq pillugu Namminersornerullutik Oqartussat nalunaarutaat nr. 12, 10. august 2006-imeersoq atorunnaarpoq.

Namminersorlutik Oqartussat, ulloq 22. december 2017


Hans Enoksen

/


Jørn Skov Nielsen